



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三百三十三

咸豐十年庚申十月辛未諭內閣劉長佑奏越南國入貢屆  
期察看道路情形請旨遵行一摺現在廣西南太潯梧等府  
軍務未竣道路尚多梗阻所有越南國丁巳辛酉兩屆例貢  
著暫行展緩俟該省軍務平靖後再由該撫具奏○又諭前  
諭直隸等省辦理團練均已次第舉行茲據侍郎梁瀚奏甘  
肅地方緊要請飭一律辦團並酌保官紳開單呈覽一摺甘  
肅壤控西陲地方遼闊且與陝西四川毗連現在四川滇匪  
未靖自應一律舉辦團練以靖邊陲所有甘肅省團練事宜

即著陝甘總督樂斌督辦。並著甘涼道蕭浚蘭、丁憂刑部員外郎吳可讀、江西候補道楊昇、幫辦團練。又諭喬松年奏請將江北新設釐局改歸江南徵收一摺。江北糧臺新設八里鋪釐局著歸江南糧臺接管徵收。所有吳全美、李德麟、師船餉需即由江南糧臺放給。又諭薛煥奏克復縣城等語。賊匪竄踞江陰縣城。經靖江縣知縣齊在鎔、署通州知州張富年並都司龔致福等統帶艇師及兵勇民團將內河賊匪木簞礮船轟毀。並將城外礮臺奪獲。九月初四日兵勇抄入東門。將城中逆匪擒斬淨盡。立將縣城克復。所有在事出力人員著准其擇尤保奏以示鼓勵。諭軍機大臣等本日據

恭親王奕訢等奏接見夷酋各情形一摺。俄酋所稱伊國欲送中國槍礮一節。前已由理藩院行文令其由陸路運至庫倫。此次欲派該國官數員帶匠役來中國教導。在西北兩路距京較遠地方請中國派員帶同兵丁數名前往學習製造。演放諸法。奕訢等恐夷言未必確實。請旨遵行等語。該夷既有此意。自係有心見好。未便遽行阻絕。著奕訢等一面行文知照俄酋。令其將槍礮送至恰克圖地方。即由內地派弁兵運回京師。省其自備經費。以示和好之意。一面於京營內遴選熟悉槍礮兵丁並奏派大員帶往恰克圖。即於該處認真學習演放各法。輪番更替。以期技藝純熟。如此辦理。庶於羈

糜之中。仍寓防閑之意。將此由六百里密諭知之。○又諭本年秋間。英俄兩國。帶兵撲犯都城。業經換約退兵。俄囉斯使臣伊格那提業幅。亦即隨後換約。該酋見恭親王奕訢等。面稱髮逆在江南等處橫行。請令中國官軍。於陸路統重兵進剿。該國撥兵三四百名。在水路會擊。必可得手。又稱明年南漕運京。恐沿途或有阻礙。伊在上海時。有咪國商人。及中國粵商。情願領價採辦臺米洋米運津。如今伊寄信上海領事官。將來夷船沙船均可裝載。用俄咪旗幟。即保無虞等語。中國勦賊運漕。斷無專借資外國之理。惟思江浙地方糜爛。兵力不敷。勦辦如借俄兵之力。幫同辦理。逆賊若能早平。我之

元氣亦可漸復。但恐該國所貪在利。藉口協同勦賊。或格外再有要求。不可不思患豫防。俄囉哂在京時。亦有此請。著曾國藩等。公同悉心體察。如利多害少。尚可為救急之方。即行迅速奏明。候旨定奪。至代運南漕一節。江浙地方淪陷。明歲能否辦理新漕。尚無定議。然漕糧為天庾正供。自不可缺。該酋所稱採辦運津之說。是否可行。應如何妥議章程。辦理之處。併著曾國藩薛煥。王有齡。酌量情形。迅速具奏。將此由六百里各密諭知之。○添派刑部尚書署步軍統領瑞常。留京辦事。與大學士桂良。均免值宿。○以正白旗滿洲副都統文盛。署正白旗護軍統領。○以催科勤奮。予河南知縣趙集成

等。加銜補用有差。○予江蘇金壇殉難同知吳德照。馮繼蕃。遊擊蘇坤。都司汪文清。守備曹錦榮等二十九人。祭葬世職。副貢生莊振岡等三十二名。口旌卹如例。○壬申。諭內閣。德楞額等奏。迎勦捻匪。偪入江南。仍督隊追襲一摺。本月初二日。捻匪由馬陵山竄撲郟城縣境。經德楞額等督同兵勇奮力迎勦。斃賊百餘名。生擒三名。其北來一股。復由港口渡河。抄襲官軍後路。適都統穆騰阿帶兵北來。乘勢夾攻。官軍勇氣倍加。復斃賊數百名。生擒七十餘名。旋因天晚。撤回城下。該逆乘夜來撲。復被礮轟斃多名。遂由港口渡河西竄。官軍追入江南邳州境內。沿河追擊。屢有斬擒。勦辦尚屬認真。著

即會同傅振邦所派兵勇。前後夾擊。悉數殲除。毋任遠颺。致留餘孽。○辦理江南糧臺。江蘇記名道江清驥奏。糧臺事件。可否自行陳奏。得旨。凡關涉糧臺事務。著照前案。由汝具奏。○以山東追勦捻匪出力。賞知縣周鵬。花翎。千總張永慶。以守備升補。○癸酉。諭軍機大臣等。本日據恭親王奕訢等奏。遵旨會同密商西巡事宜。並開列條款呈覽。西巡事關重大。必須慎重圖維。以期悉臻妥善。現在不過先事豫籌。須俟明年二三月間。察看夷人如何舉動。再行酌量辦理。將此由六百里密諭知之。○又諭。本日據樂斌奏。酌帶官兵赴京。並英桂請赴行在。陛見各一摺。現在夷氛已退。樂斌著帶兵折回。

甘省英桂亦毋庸馳赴行在。陛見即回山西。辦理勸捐籌餉。及地方各事宜。本日復據恭親王奕訢等會同密商。西巡事宜。並酌議條款。開單呈覽。京師為根本重地。自不便輕議遷移。即巡幸之舉。亦必須籌畫萬全。方為妥善。夷人現雖盡退。明歲尚來駐京。能否相安。實難豫定。自宜豫擇一巡幸之地。以期有備無患。陝西古稱天府。雄據上游。與中原聲息相通。人心繫屬。轉餉亦易。誠為便宜。將來蹕路經行。由山西太原。平陽等處。折入潼關。尚屬可行。惟事屬創始。所有沿途行宮。尖宿處所。及慎設防守。籌畫經費各事宜。必須先為籌議。周妥。始可舉行。英桂係會同密議之員。著即將酌議條款鈔錄。

知照樂斌。譚廷襄。即與該督等密為函商。妥議章程。具奏。其中。有無窒礙之處。著一併詳細數陳。毋稍遷就。將此由六百里各密諭知之。○又諭慶端奏。賊蹤闖入淳安。浙東軍情緊急。請飭毓科抽調林福祥所部各軍。馳赴三衢堵剿等語。現在浙江嚴州府城。已被逆匪攻陷。情形危迫。待援孔殷。閩省援浙兵勇。已先後派往一萬餘名。勢難再行續調。升任福建臬司林福祥。現在江西帶兵。所部定武軍及親兵營。素稱得力。著毓科迅飭林福祥。於所部兵勇內。抽調二三千名。派得力員弁管帶。星馳赴浙。援剿。應用糧餉軍火。並著該撫迅速籌備。固三衢之門戶。即以保豫章之藩籬。務期不分畛域。趕

緊籌辦。毋得遷延推諉。致誤事機。將此由六百里諭令知之。  
○暫革都察院左副都御史張芾。奏請應否來京。或回籍守制。得旨。著即行回籍補行守制。汝年尚壯。將來報效。為日正長。朕自中秋抵承德後。身體安健。特諭汝知。○予貴州廣順州殉難在籍翰林院檢討但鍾良。知縣但蔭良。祭葬世職。並其親屬家丁三十三名口。旌卹如例。○甲戌。諭內閣。恆福奏。請將打用過站車輛之署知縣。摘頂撤任一摺。直隸署定興縣知縣錢瑩。於兵差過境時。率將清苑。安肅二縣車輛扣留。打用過站。實屬任意取巧。錢瑩著摘去頂帶。撤任。留於定興地方。幫同接署之員。辦理後起兵差。以觀後效。如再不知愧。

奮。即行從嚴叅辦。○又諭。綿勳等奏。帶兵侍衛逃避。請分別治罪一摺。八月間。官軍駐劄廣渠門外。領隊侍衛伯爵崇岳。棄隊逃走。侍衛福成。因病請假。久未回營。實屬逃避取巧。崇岳。福成。均著即行革職。交部分別治罪。以肅戎政。○諭軍機大臣等。倭仁等奏。請將通商條約先行封寄等語。前據恭親王奕訢等奏。啖啡兩國條約。交夷酋帶往各省。茲據倭仁等奏。稱夷人刊刻條約。自行宣布。恐真偽莫辨。轉多藉口。奉天海口新設埠口。尤關緊要。所有啖啡等國。八年及本年所議條約。著奕訢鈔錄一分。先行密封寄交倭仁等。斟酌辦理。其餘閩。浙。兩廣。山東。江蘇。浙江等省。均著一體鈔寄。以免歧誤。

將此密諭知之。○以河南光州勦擒出力。賞在籍翰林院庶吉士吳元炳。花翎。知府用。知州祝壇。道銜。○改鑄浙江鹽運司經歷印信。從巡撫王有齡請也。○乙亥。諭內閣。內務府奏。遵旨查明前任總管內務府大臣文豐子孫具奏一摺。文豐之子。造辦處郎中兼驍騎參領廣毓。茶庫員外郎廣麟。慎刑司郎中兼驍騎參領廣順。均著俟百日孝滿後。由該旗帶領引見。伊孫候補員外郎福恩。候補主事福榮。福山。官學生福瑞。均著俟服滿後。帶領引見。其年未及歲者。俟及歲後。再行帶領。以示朕篤念蓋臣至意。○諭軍機大臣等。德楞額奏。擊退圍攻重豐賊匪。現催援軍併力夾擊一摺。擒逆圍攻重豐

民圩。經德楞額等督兵追勦。立將該逆壓退。惟追躡失利。色爾固善受傷。賊眾兵單。未能得手。大股賊匪尚在邳州一帶。恐其渡河紛擾。冀圖北犯。著文煜即飭各路官軍。自滕縣迎擊。並飭富新移營前進。會同郝上庠督帶民團。合力兜擊。德楞額亦當激勵士卒。會合夾攻。並飭沿途州縣統帶民團。併力抄截。毋令北竄。將此由六百里各諭令知之。○又諭。前因都興阿奏。由臨淮改道兼程北上。當諭令即行折回。迅赴江北會勦。本日據德楞額奏。都興阿已由紅花埠馳抵郟城。會同將圍攻重豐逆匪擊退。復業已督兵北上等語。自係尚未接奉疊次寄諭。現在京師撫局已定。夷兵撤回。都興阿著仍

遵前旨。無論行抵何處。即行折回江北。督辦防勦。以靖逆氛。將此由六百里諭令知之。○又諭。本日據慶廉奏。請添調馬步官兵。並瀝陳兵餉支絀情形。各摺片。皖捻句連粵逆。馳騁豫境。自歸陳以達光汝。慘遭荼毒。祇以限於兵力。未能出境窮追。該撫通籌大局。請調吉林黑龍江馬隊三千名。陝甘官兵三千名。自係為力埽賊氛起見。惟前調吉林黑龍江馬隊及陝甘官兵。現因畿南一帶土匪蠶起。已諭令勝保撥歸僧格林沁。瑞麟軍營。以資攻勦。其陝甘本省官兵。所存無幾。難以續調。且增兵必須增餉。現在餉源支絀。該撫惟當就現有兵力。簡練精銳。督飭在事將弁。肅清豫境。俟僧格林沁等由

直隸。山東。漸及河南。即可會合豫軍。直搗賊巢。併力埽蕩。另片奏。兵餉支絀各情。現在兵勇既不加增。餉糈可從節省。且毛昶熙所辦團練。均係民捐民辦。無須另募勇丁。致多糜費。著慶廉飭令該藩司。仍按從前月餉數目。源源籌撥。並嚴督經管糧臺之員。覈實支放。毋許稍有冒濫。以節浮靡。將此由六百里諭令知之。○又諭。前據戶部奏。庫款支絀。兵餉不敷散放。請暫行借撥銀兩。當經諭令由宗人府存儲銀兩內酌借散放。俟各省餉項續解到部時。即行歸款。茲據全慶等奏。稱宗人府庫存吉地餉銀。共計五十八萬四千兩。除恭親王奕訢遵旨提撥銀四十萬兩外。僅存銀十八萬兩。戶部現擬

酌借銀十八萬兩。未便儘數撥借。請將陝西解到暫存戶部吉地餉銀七萬四千兩。就近撥借該部等語。宗人府現在吉地工程銀兩。為數已屬無多。轉瞬來歲春融。應行興修工項。亦須先為籌備。自未便將庫存銀兩。儘數撥借。著將陝西解到暫存戶部吉地餉銀七萬四千兩。就近撥借該部。以充兵餉。所餘銀兩。仍存宗人府庫。以備明春興修之用。其先後撥借宗人府庫銀四十七萬四千兩。著戶部於各省餉銀解到時。陸續歸款。並著戶部將各省應解各款。嚴行咨催。剋期解京。以期毋誤要需。將此各諭令知之。○予淀園殉難員外郎秦清。六品苑丞秦衷。祭葬世職。其親屬家丁十三名。口旌卹。

如例。○丙子。

上詣

安遠廟。

普樂寺拈香。○諭內閣。巴棟阿奏。請將江北捐款。分濟鎮防兵餉一摺。所有江北糧臺籌辦畝捐房捐。除揚屬八州縣。仍歸江北糧臺籌辦外。其常鎮通海道所轄之通海五廳州縣。著准其撥歸鎮防。以濟餉需。即著巴棟阿。飭令鎮江府知府師榮光。認真督辦。其江北糧臺。及總辦揚通畝捐之候選道吳文錫。即毋庸會辦。以專責成。○又諭。御史寶麟等。奏參各衙門送刷文卷逾限。開單呈覽。並請覈對展限一摺。部院大

小各衙門錢糧文卷例應於八月初旬送河南道覈對刷卷。本年逾限未送者甚多。除順天府業經聲明展限毋庸議處外。其餘逾限各衙門著該部院按單內所開查取職名照例議處。仍著各該衙門飭令各該處將彙卷檢齊移送該道覈對。毋再遲延。至此項文卷紛繁必須詳加磨對著准展至明年三月內繕寫黃冊呈覽。○諭軍機大臣等前因僧格林沁等軍營需餉傳諭文謙迅籌銀二十萬兩分起解往以資接濟。茲據奏稱庫項竭蹶擬俟各屬錢糧收庫後先撥給僧格林沁軍營三萬兩其勝保營內所有天津等處官兵擬酌撥銀一萬五千兩並稱用多入少不能不量入為出擬此後每

月酌撥僧格林沁軍營月餉銀二萬五千兩勝保軍營月餉銀一萬五千兩按期解往其餘仍應由各該糧臺另行籌議各等語直隸藩庫支絀係屬實在情形惟據該藩司所擬各營月撥之款是否足敷支放著僧格林沁瑞麟勝保詳細覈實查明具奏如為數不敷應如何另行籌議之處即著該大臣等迅速籌畫以足兵食將此由六百里各諭令知之○福建陸路提督李若珠奏龍袍洲賊匪分竄瓜揚兜勦獲勝得旨此次獲勝自係賊壘尚未堅定若再有大舉必以全力撲犯著嚴督勦辦勿令下竄一步○署湖南巡撫瞿誥奏遵解京餉五萬兩得旨著懍遵前旨速行另籌十數萬兩以濟急

需○並漕折未解一半○一並迅解○以江蘇青浦縣勦賊出力○  
賞還總兵官曾秉忠頂帶○復副將向奎職○丁丑○諭內閣○翁  
同書奏○遊擊之母訓子有方○懇恩獎勵等語○副將銜候補遊  
擊孫之友之母孫劉氏○先命其子率眾投誠○嗣因逆犯亳州○  
復令登陴固守○克保危城○該氏年逾七十○深明大義○實屬可  
嘉○孫劉氏著加恩准照其子副將升銜○給予二品封典○以為  
母訓克端者勸○諭軍機大臣等○本日據僧格林沁等奏○查  
辦直隸土匪情形○並擬移兵東省○勦辦擒匪各摺片○僧格林  
沁等○自行抵河間後○經各地方鄉團會同兵役○陸續緝獲土  
匪○分別正法○各匪以次解散○該大臣擬即督帶馬步各隊○取

道東昌○以次南下○勦辦擒匪○瑞麟暫駐河間○等候後起兵丁○  
其衡水靜海等處○已札飭冷慶許誦恆等○帶兵梭巡彈壓○並  
令各州縣查明出力鄉團鼓勵○所籌均尚周妥○即著照所擬  
辦理○山東擒匪曹州一帶已報肅清○尚有大股擒匪擾及嶧  
境○德楞額所帶兵勇失利○已諭文煜會合該副都統迎前截  
擊○杜其北犯○該匪飄忽無常○避實乘虛○是其慣技○此次深入  
東境○蹂躪二十九州縣○並未大受懲創○該大臣行抵東豫後○  
必須會合兩省兵力○進搗匪巢○以期一鼓蕩平○是為至要○將  
此由六百里各諭令知之○又諭○前據僧格林沁等奏○不日  
帶兵南下○請調勝保營陝甘官兵四千名○復據勝保奏稱○兵

力無可分撥。當經諭令勝保將此項官兵迅速撥赴僧格林沁等軍營矣。本日據僧格林沁等奏直隸土匪漸次解散。擬即由河間取道東昌。勦辦捻匪。俟續調陝甘官兵到齊。即行前進。並稱勝保擬勻撥川楚勇各二千名。恐難得力。各等語。僧格林沁移兵東省。勦辦捻匪。亟應厚集兵力。以壯聲威。此項官兵。若留於勝保軍營。徒事防守。未免可惜。著勝保仍遵前旨。將前項陝甘官兵四千名。迅速撥赴僧格林沁軍營。以資攻勦。而利遄行。毋得延誤。該大臣所調河南川楚各勇三千名。並著酌量撤回原省。以節糜費。將此由六百里諭令知之。○又諭僧格林沁等奏請裁減兵額等語。據稱本年天津

海口一帶接仗。察哈爾官兵首先潰敗。實屬不堪調用。而該處兵額最多。若不量子裁減。必致虛糜糧餉。所籌自係為節省經費起見。著慶昫查明該處兵額共若干名。其分撥各台者若干。游牧者若干。汰除老弱。簡擇精壯。尚可練習者若干。應如何酌量分別裁減之處。即著妥議具奏。將此諭令知之。○又諭現在各省文報遞至良鄉縣後。轉遞京城。再由兵部遞交順義縣。接遞行在。未免耽延時日。著恆福即飭良鄉縣於接到文報時。徑遞順義縣接遞。毋庸由京轉遞。如該二縣相距程途稍遠。即於中途添設腰撥。以免稽遲。將此諭令知之。○又諭察抗阿奏據住京俄羅斯達喇嘛固里報稱俄羅

斯北館後牆有空地一段。官房七間。求為查驗。給予圈進館內。建蓋房間。當經該衙門查明該處官街空地內有官房七間。俱損壞坍塌。可否給予俄羅斯北館圈進之處。據情請旨等語。此項地段既係官街空地。基址亦不甚大。官房七間。亦經坍塌。即著給與該館。准其建蓋房屋。惟不得於原指丈尺之外。再行侵越。將此諭令知之。○又諭。僧格林沁等奏。請飭豫東辦理糧臺等語。前命僧格林沁。瑞麟。帶兵勦辦匪徒。現在河間土匪業已解散。不日由直啟程。前往山東。如該省地方肅清。即赴河南勦辦捻匪。所帶兵勇萬餘名。亟應寬為籌備餉糈。以資支應。著文煜。慶廉。按照該大臣等咨撥之數。迅

即籌解。並各揀派司道大員。辦理該大臣等糧臺事務。毋令匱乏。將此由六百里諭令知之。○又諭。戶部奏。各省欠解京餉過多。請飭催籌撥。開單呈覽一摺。各直省奉撥京餉。欠解過多。現在部庫支絀。冬季支放各款。為數甚鉅。若再遲延。挖欠。致誤大局。關係非輕。據該部單開本年京餉。截至九月止。山西欠解地丁銀一百萬兩。山東欠解地丁銀五十萬兩。鹽課銀十八萬兩。河南欠解地丁銀六十五萬兩。陝西欠解地丁銀十三萬六千兩。零。四川欠解銀二十九萬兩。浙江鹽課銀三十萬兩。江海關稅銀六十萬兩。均未據報解。又積欠陳餉。應分年帶解項下。山東欠銀十二萬餘兩。河南欠銀二十

萬餘兩。浙江欠銀十二萬餘兩。又奏撥各省洋藥稅釐。閩海關已報啟程銀五萬兩。山海關未解銀四萬八千兩。河南省未解銀四萬五千兩。其天津關之五萬兩。臨清關之五千兩。江海關之二十萬兩。夔關。山東省。四川省。山西省。之各十萬兩。陝西省之八萬兩。揚州關。淮安關。許墅關。北新關。之各一萬兩。均未據解到。當此需用緊急之時。豈容任意延宕。著恆福。文煜。常績。慶廉。譚廷襄。王有齡。慶端。瑞瓊。曾國藩。薛煥。崇實。文謙。寬惠。毓清。各將應解欠款。迅速籌撥。務於開印前。歸數解京。毋得遷延。致干重咎。此外各關監督。並著該督撫等。一體嚴催。趕緊報解。另片奏。另撥附近省分銀兩。尚未報解。

等語。前經該部咨撥山西省銀三十萬兩。山東河南各十五萬兩。此係賠償兵費銀兩。已由內庫借動。尤應迅速批解。歸還原款。並著常績。文煜。慶廉。無論何款。即行撥解。毋再延誤。將此由六百里諭知恆福等。並傳諭文謙等知之。○浙江巡撫王有齡奏。請留何桂清會辦浙防。得旨。所請斷不准行。○以河南歸德府等處防勦出力。賞工部員外郎梁燦。州判銜謝維軻。花翎。巡檢汪英福等。藍翎。餘加銜升敘。復官有差。○命湖南在籍前任陝甘總督易棠。內閣學士周玉麒。翰林院侍讀學士丁善慶。幫辦團練。○予安徽廬江縣等處陣亡文生鮑雲鵬。賞卹如等。並建專祠。殉難縣丞裴克瑞。夏光前。程

銑及其子外委程元勛。府經歷余樞。六品藍翎周恩。從九品凌焜。祭葬世職。文生李位卿等二十九名。旌卹如例。予安徽廣德州陣亡州判陳建章。學正趙對澂。訓導宋載陽。守備郭世升。千總汪驥。把總鄂奏功。外委王茂榮等。祭葬世職。歲貢生湯培庚等。旌卹如例。予浙江杭州等處殉難參將銜胡應元。遊擊楊家正。都司楊光富。梁鎮邦。守備唐玉喬。縣丞馮譽驛。從九品范鳴球。典史董光照。千總李玉華。把總伍逢雲。外委朱湮等。祭葬世職。紳民婦女文生湛榕等一千四百十二名。旌卹如例。予江蘇傷亡副將余兆青。祭葬世職。戊寅。諭軍機大臣等。王夢齡奏。請將應行封儲款項。先

行提撥等語。部撥粵海關徵存稅銀二十萬兩。係應交王夢齡另款封儲之項。既據該署漕督奏。江南糧臺解撥寥寥。大江。水師及鎮營兵勇。無款可籌。著准其於粵海關餉二十萬兩內。先提銀十萬兩。撥交江南糧臺。支應水陸各餉。仍責成辦理糧臺各員。覈實造報。以重帑項。將此由六百里諭令知之。又諭。前因德楞額奏。捻逆在邳州一帶搶渡運河。擾及嶧境。當經諭令文煜督飭各軍。由滕縣會合德楞額之軍。併力夾擊。本日據文煜奏稱。捻匪現由江南贛榆縣之青口折回。仍在蘭邳嶧邳交界屯聚。並據探聞該匪南撲邳州之窰灣。以江南團練堵禦。未能過河。折赴臺莊。迤東三里之黃林

莊頭起已過運河。因上流水發。餘匪尚在邳嶧一帶游奕等語。匪蹤飄忽無常。此等彼竄。是其慣技。亟宜痛加勦洗。以期盡殲醜類。文煜現已行抵沂州。著即督飭各路兵勇。會合德楞額之兵。認真勦擊邳嶧一帶游匪。悉數殲除。並著王夢齡飭令派出各員弁。迎頭堵勦。毋任滋蔓。將此由六百里各諭令知之。○署漕運總督王夢齡奏。現飭已革監掣同知許敦詩。捐備棉衣濟軍。於捐項內扣抵得旨。該革員捐備棉衣。不准在捐項內扣除。將來銀兩交清。另將棉衣覈價。酌給獎敘。○以奏報不實。甯古塔副都統德楞額。下部議處。仍督辦山東勦匪事宜。○己卯諭內閣。戶部奏。請將添設看倉兵丁裁

撤一摺。京師各倉額設防兵。原為嚴防宵小起見。著倉場侍郎成琦。廉兆綸。嚴飭各倉巡守之員弁兵丁。實力防護。並著該侍郎等。隨時密行稽查。儻有曠誤疏失。即著嚴叅懲辦。所有前次奏明添設官兵四百名。即行裁撤。以節糜費。○賞還前任倉場侍郎崇綸家產。○庚辰諭內閣。袁甲三奏。訊明奉調員弁。延不就道各緣由。分別定擬一摺。前因傅振邦奏。吉林四起馬隊官兵。由徐州調赴臨淮。延不就道。當經降旨。將帶隊之協領穆克德布等。分別議處革職。交袁甲三嚴行審訊。茲據該大臣奏稱。審明協領穆克德布。奉調臨淮。隨即帶隊赴徐州。稟請籌撥欠餉。一面督催啟程。尚無不合。其稟揭

參領佟陞等赴寓詳辯。藉示懲儆。亦非妄揭屬員。餉銀均經分給。實無剋扣情弊。該協領打仗尚稱奮勇。著准其開復降調處分。仍留軍營帶隊。以資攻勦。五品頂翎儘先驍騎校全林。六品頂翎前鋒依常保。不能約束兵丁。商同佟陞等。赴穆克德布寓所剖辯。並與佟陞等稟許穆克德布。以掩其遲延之咎。實屬藉詞遮飾。庸懦無能。全林依常保均著即行革職。與已革之委參領佟陞。劉泰。署參領德祥。一併勒令回旗。以肅營伍。○又諭前因慶廉奏參藩司賈臻。膜視軍餉。當經諭令慶廉嚴飭該司迅籌報解。儻敢仍前玩泄。即著嚴參懲辦。茲據賈臻奏參慶廉貪婪欺罔。舉止乖謬各情。慶廉賈臻以

撫藩大員。互相叅奏。必應嚴切根究。以肅官箴。慶廉賈臻均著即行撤任。交新任河南巡撫嚴樹森。秉公查辦。毋許瞻徇。○諭軍機大臣等。前據恭親王奕訢等奏。俄咪等國八年間所換和約各件。並咪國國書。因啖哪兩國滋擾。淀園均已遺失。當經諭令恭親王等飭恆祺等。在津向各國詢明取回。茲據奏稱。恆祺已向該酋再三盤詰。聲稱當時拋棄焚燒。事所難定。並據俄酋伊格那提業幅。面告奕訢云。條約已經刊布。別無他用。無需尋覓各等語。因思咪國遠在上海。尚未知悉。著薛煥即行知照咪酋。告以該國國書及原本條約稅則。存在海。淀。被啖哪等國滋擾時。業已遺失。尋覓無蹤。現在條約

刊本業經通行各省。將來遇有兩國交涉事件。均可照此為憑。其原本有無。無足重輕。如此豫為說明。免致將來饒舌。將此由六百里密諭知之。○又諭文煜奏。擒匪被擊竄回老巢。東境肅清。擬回省辦理夷務一摺。此次逆捻出巢。由東省魚臺金鄉渡河。經各州縣團勇會合官軍。極力堵禦。將該逆擊竄回巢。東境一律肅清。文煜著即回省。仍著分派員弁。揆捕土匪。並安撫難民。無令失所。現在暎啡各國條約。業已通行各省。俟該夷酋行抵登州。即著文煜前往海口。悉心籌辦通商事宜。以期永遠相安。此次捻匪竄入東境。係由魚臺金鄉一帶。該處係何員帶兵駐劄。防堵不力。有應得之咎。著文煜

查明參奏。本日據袁甲三奏。總兵張得勝帶勇北上。截留山東。應否飭令回營等語。現在撫局已成。張得勝所帶兵丁。毋須北上。袁甲三軍營正當攻勦喫緊之時。文煜即飭該總兵回營助勦。將此由六百里諭令知之。○又諭前因江陰縣城克復。宜有重兵守禦。諭令巴棟阿於鎮江大營內抽撥一軍。迅赴江陰屯守。茲據巴棟阿奏稱。原擬抽調兵勇三千名。前往江陰駐劄。旋因大股逆黨。自向容等處竄至湯崗築壘。侵犯鎮城。現將分派江陰之軍。撤下一千五百名。留備防守。以一千五百名。飭副將富陞管帶。前赴江陰。一面咨行李若珠。於江北軍營撥兵一千五百名。同赴江陰駐劄等語。鎮江附

近一帶逆黨麇聚。該處防務緊要。勢難多撥兵勇。分駐江陰。著李若珠。於江北大營內。迅撥精兵一千五百名。派委得力鎮將。帶赴江陰。會同鎮江所派兵勇。駐劄該城。嚴密防守。毋得遲延推諉。致誤事機。將此由六百里諭令知之。○又諭恭親王奕訢等奏。英國欲於長江通商。業經給予照覆。允准一摺。長江通商一節。八年原定和約內載明。除鎮江一年後立口通商外。其餘自漢口溯流至海各地。選擇不逾三口。准為夷船出進貨物通商之區。今該國以撫局已成。欲先赴漢口九江兩處開商。應納稅餉。或在上海鎮江各關。按照新章交納。並據該酋照會內稱。先向海關報明護船兵器火藥鉛彈。

等物。請給照單。該關口查明所報軍器數目。如在情理之中。即註明給發。儻有額外軍器。或並無照單。私行售賣者。即將該船所載貨物。全行入官。並驅逐該船出口。不准在江面貿易各等語。該夷此次嚴定章程。無非慮中國防其勾結賊匪。售賣軍火等物。有意存見好之心。業經恭親王等。允其咨照湖北江西督撫矣。惟漢口九江兩處。係屬通商創始。所有一切章程。必須按照條約。與之妥為商定。毋令別生枝節。以期永遠相安。其進口出口。應納稅餉。恭親王已令其與上海關公同商酌。亦須明定章程。免致稅課虧短。至該洋船所帶兵器火藥等。已據該酋聲明在海關呈報。均須嚴密稽查。照章

辦理其經行江面地方所有防守弁兵俱應飭令一體知悉毋得滋生疑慮以致別啟釁端著官文胡林翼薛煥毓科巴棟阿李若珠等悉心妥辦總期杜漸防微而又不致有傷和好方為至要將此由六百里各密諭知之○欽差大臣兩江總督曾國藩奏截留江北餉二萬兩得旨依議辦理惟明春汝帶兵前往淮揚尚須臨時斟酌○命都察院左副都御史銜順天府府丞毛昶熙督辦河南勦匪事宜○以湖北布政使嚴樹森為河南巡撫未到任前以河東河道總督黃贊湯暫行兼署湖北按察使唐訓方為布政使廣東鹽運使裕麟為湖北按察使河南按察使邊浴禮為布政使南汝光道鄭

元善為按察使○以私自離營革安徽守備滕加受職

大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三百三十三

